

**Resolución do 21 de marzo da Dirección Xeral de Ordenación e Innovación Educativa pola que se convoca o V Concurso de Podcasts – Radio na biblio, destinado a centros públicos non universitarios de titularidade da Consellería de Cultura, Educación, Formación Profesional e Universidades, en colaboración coa Radio Galega (CRTVG), no contexto do PLAN LÍA de Bibliotecas Escolares (Lectura, Información e Aprendizaxe).**

A Consellería de Cultura, Educación, Formación Profesional e Universidades recolle no seu Plan LÍA de Bibliotecas Escolares unhas liñas de actuación preferentes. A liña referida ás "*Alfabetizacións múltiples*", con medidas destinadas á mellora das capacidades lectoras do alumnado, en sentido amplo e, pola súa parte, a liña das "*Competencias ALFIN/AM*" contempla o deseño e desenvolvemento de programas para a mellora da competencia informacional e mediática do alumnado galego e detalla, como medida concreta, a posta en marcha dun programa de radio escolar con vinculación á biblioteca. O Plan LÍA recolle tamén "*A biblioteca como centro creativo de aprendizaxes*", onde se propoñen diferentes medidas para a evolución de todas as bibliotecas escolares cara a "laboratorios creativos de aprendizaxe", unha evolución natural do modelo de biblioteca, na medida en que esta se configura como un espazo físico e simbólico de oportunidades para desenvolver proxectos colaborativos conectados ao tratamento do currículo; tamén para dar resposta a unha gran variedade de intereses culturais e formativos dos distintos sectores da comunidade educativa.

Neste contexto iniciouse no curso 2017/2018 o programa "Radio na biblio", no que poden participar centros integrados no Plambe e que acolle na súa sexta convocatoria un total de 168 centros de titularidade pública, cun notable éxito de resultados. Desde o programa de bibliotecas obsérvase un grande interese pola creación de laboratorios de radio máis alá deste grupo de centros, e asistimos a unha renovación do interese do profesorado por esta ferramenta de gran potencial pedagóxico para reforzar as prácticas comunicativas do alumnado e a motivación para participar en proxectos colaborativos nos que se traballan distintas habilidades e competencias a través de tarefas complexas que constitúen oportunidades de aprendizaxe e de inclusión para todo o alumnado do centro.

En colaboración coa CRTVG, a través da Dirección da Radio Galega, co gallo da dedicación do Día das Letras Galegas de 2023 ao intelectual, escritor, activista político e cultural, articulista, editor e ensaísta Francisco Fernández del Riego, acordouse realizar a convocatoria dun concurso de podcasts radiofónicos, destinado aos centros públicos integrados no programa Radio na Biblio con extensión a outros centros de titularidade da consellería que traballan xa coa radio como ferramenta pedagóxica, co fin de estimular a valoración da lingua materna, reforzar a lectura en galego ou o achegamento ao mundo da edición e da tradución, e da importancia do activismo cultural a partir dos anos 50 do que foi protagonista, entre outros, o autor homenaxeado.

De acordo con anteriormente exposto esta dirección xeral,

RESOLVE:

DIRECCIÓN XERAL DE ORDENACIÓN E INNOVACIÓN EDUCATIVA  
Complejo Administrativo San Caetano  
Edificio número 2; Andar 2º  
15781 Santiago de Compostela  
981 546 503  
[dxoie@xunta.gal](mailto:dxoie@xunta.gal)



## Apartado 1: Obxecto

Estimular, mediante o recoñecemento de boas experiencias, a elaboración de produtos radiofónicos enfocados a salientar a valoración da lingua materna, reforzar a lectura de poesía galega ou o achegamento ao mundo da edición, e da tradución, e da importancia do activismo cultural a partir dos anos 50.

## Apartado 2 : Destinatarios

Poderán participar neste **V Concurso de Podcasts-Radio na biblio** os centros públicos non universitarios de titularidade da Consellería de Cultura, Educación, Formación Profesional e Universidades, das distintas tipoloxías, integrados ou non no programa Radio na biblio pero que teñan unha emisora de radio escolar.

## Apartado 3: Premios e dotación económica

Realizada a selección de traballos merecedores de recoñecemento, distribuiranse asignacións específicas, segundo se recolle no texto da convocatoria, a través da partida orzamentaria **10.06.423A.640.10** destinada á atención das bibliotecas escolares, do orzamento da Consellería de Educación, Cultura e Universidade, para o ano 2023, por un máximo global de **8.000 €**.

Cada centro educativo poderá presentar un máximo de 3 podcasts. Os traballos presentados estarán realizados en lingua galega.

Establécense catro modalidades, segundo o nivel do ensino, e seleccionaranse dous podcasts por modalidade, atendendo á orixinalidade do traballo e a calidade sonora e de contido.

| Modalidades                                     | Premio       | Importe       |
|---|--------------|---------------|
| I. Alumnado de Infantil e 1º/2º de Primaria     | 1º premio    | 1.000 €       |
|   | 2º premio    | 1.000 €       |
| II. Alumnado de 3º a 6º de Primaria             | 1º premio    | 1.000 €       |
|   | 2º premio    | 1.000 €       |
| III. Alumnado de Secundaria                     | 1º premio    | 1.000 €       |
|   | 2º premio    | 1.000 €       |
| IV. Alumnado de Bacharelato e outras ensinanzas | 1º premio    | 1.000 €       |
|   | 2º premio    | 1.000 €       |
|   | <b>Total</b> | <b>8.000€</b> |



O premio redundará en melloras no laboratorio/emisora de radio ou para actividades relacionadas co funcionamento do laboratorio de radio, sempre vinculado á biblioteca do centro. Así mesmo, os centros premiados poderán visitar as instalacións da Radio Galega en Santiago de Compostela, tras un acordo previo.

Os premios poderán ser declarados desertos nalgunha das modalidades ou temáticas. De ser o caso, poderían seleccionarse máis podcasts noutras modalidades con moita participación.

Os premios serán compatibles con outros ingresos ou recursos destinados á biblioteca escolar e ao seu funcionamento, así como premios de innovación ou outros, procedentes de calquera Administración pública, entes públicos ou privados, da comunidade, nacionais, da Unión Europea ou de organismos internacionais.

#### Apartado 4. Temática

Como o homenaxeado nas Letras Galegas deste ano é **Francisco Fernández del Riego**, intelectual, escritor, activista político e cultural, articulista, editor e ensaísta, a temática poderá versar sobre:

- Aspectos bio-bibliográficos do autor homenaxeado, especialmente aqueles vinculados á lingua materna.
- Estimulación da lectura xornalística e epistolar en galego.
- mundo da edición e da tradución.
- A preservación do patrimonio bibliográfico.
- Activismo cultural a partir dos anos 50.

#### Apartado 5. Requisitos e modo de presentación de traballos

Para participar nesta convocatoria será necesaria a presentación da seguinte documentación dentro da solicitude que se creará na aplicación aloxada no enderezo: <https://www.edu.xunta.gal/programasbibliotecas/>

- O/os podcast, en formato .mp3/.wav: pode ser unha *entrevista*, unha *cuña publicitaria*, un *noticiei*ro, un *faladoiro*, un *recital*, un *debate*, un *programa monográfico*... **O programa estará realizado en lingua galega.**
- Os centros educativos poderán concursar enviando entre 1 e 3 podcasts, cunha duración mínima de 3 minutos e máxima de 5. Cada podcast entregárase nunha solicitude independente.
- Breve relación do contido de cada podcast (guión ou escaleta) e descrición da experiencia de creación de cada arquivo.



- Material gráfico (de unha a tres imaxes formato .jpg ou .png) sobre o momento da gravación do podcast ou do seu proceso de elaboración.
- Relación de participantes no podcast (alumnado e profesorado e outros participantes).
- Formularios asinados autorizando a participación (en caso de menores) e o emprego da imaxe e voz con fins educativos (todas/os as/os participantes). Anexo I

### **Apartado 6. Prazo de solicitude**

O prazo para a presentación de solicitude de participación e do resto da documentación recollida nas bases deste concurso comezará ao día seguinte da súa publicación e rematará o 28 de abril de 2023.

A Dirección Xeral de Ordenación e Innovación Educativa poderá solicitar dos centros a documentación complementaria que estime oportuna antes de resolver a convocatoria.

### **Apartado 7. Comisión de selección**

1. A comisión de selección estará firmada por:
  - a) Presidencia: a persoa titular da subdirección xeral de Ordenación, Inclusión e Innovación Educativa, ou persoa en quen delegue.
  - b) Vogalía: a persoa responsable da xefatura de servizo de Innovación e Programas educativos; a persoa responsable da xefatura de servizo de xestión de contidos e de programación da Radio Galega e as persoas asesoras do servizo de Innovación e Programas educativos, unha delas actuará como secretaria.
2. A comisión terá facultades para resolver as dúbidas que xurdan na interpretación das bases desta convocatoria.
3. Para a valoración das candidaturas, a comisión de selección poderá requirir aos solicitantes cantos documentos e aclaracións considere necesarios, visitas ao centro e a defensa pública da súa memoria descritiva.

### **Apartado 8. Criterios de valoración e requisitos**

Para a selección dos podcasts teranse en conta a orixinalidade, interdisciplinariedade do proxecto e a calidade técnica do traballo realizado; a contribución ao desenvolvemento do currículo no contexto da temática do concurso, así como á adquisición de competencias clave; a contribución específica á competencia informacional e mediática do alumnado; a participación activa de alumnado, profesorado e comunidade educativa no seu conxunto; o aproveitamento das posibilidades e recursos da biblioteca escolar; a integración da biblioteca e outros equipos e programas do centro para o desenvolvemento da produción sonora presentada.



Teranse en conta os seguintes criterios de valoración:

- a) Orixinalidade, interdisciplinariedade do proxecto e calidade técnica do traballo realizado. **Máximo 10 puntos.**
- b) Contribución ao desenvolvemento do currículo, no contexto da temática do concurso, e adquisición de competencias clave. **Máximo 10 puntos.**
- c) Contribución específica á competencia informacional e mediática do alumnado. **Máximo 10 puntos.**
- d) Participación activa de alumnado, profesorado e comunidade educativa no seu conxunto. **Máximo 10 puntos.**
- e) Aproveitamento das posibilidades e os recursos da biblioteca escolar. **Máximo 10 puntos.**
- f) Integración da biblioteca e outros equipos e programas do centro para o desenvolvemento da produción sonora presentada. **Máximo 10 puntos.**

### **Apartado 9. Resolución**

1. A comisión de selección, unha vez avaliadas as solicitudes presentadas, emitirá unha proposta de resolución de concesión de premios que trasladará á Directora xeral de Ordenación e Innovación Educativa, quen ditará resolución.
2. A resolución de concesión de premios, na que se incluírán os centros seleccionados e o importe do premio asignado a cada un deles, publicarase no portal educativo <http://www.edu.xunta.gal>.
3. O prazo para resolver as solicitudes correspondentes ás accións desta resolución será de cinco meses, e comezará a contar desde o día seguinte á data de remate do prazo de presentación de solicitudes. Transcorrido este prazo sen que se dite resolución expresa, as persoas interesadas poderán entender desestimadas as súas solicitudes por silencio administrativo.
4. A Consellería poderá convocar os responsables dos centros e dos traballos presentados a un acto de entrega simbólica dos galardóns.
5. Contra esta resolución, que non esgota a vía administrativa, poderase interpoñer recurso de alzada ante a persoa titular da consellería no prazo dun mes contado a partir do día seguinte ao da publicación desta resolución no portal educativo, segundo o disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas ou ben directamente o recurso contencioso administrativo ante a Sala do Contencioso-Administrativo do Tribunal Superior de Xustiza de Galicia, no prazo de dous meses, de conformidade co artigo 46 da Lei 29/1998, do 13 de xullo, reguladora da xurisdición contencioso-administrativa.



## Apartado 10. Pagamento dos premios

O pagamento farase conforme ao seguinte procedemento:

- As contías asignadas por estes premios serán transferidas aos centros nun único pagamento e no período correspondente ao exercicio económico 2023.
- O importe concedido a cada centro premiado deberá destinarse a sufragar gastos que estean debidamente xustificadas e imputables ao obxecto do premio.
- As facturas, así como os seus xustificantes de pagamento, deberán quedar debidamente arquivados na secretaría do centro.
- A Consellería de Cultura, Educación, Formación Profesional e Universidades poderá solicitar información sobre os custos específicos derivados desta resolución, polo que estes gastos deberán estar perfectamente identificados na contabilidade do centro.

## Apartado 11. Difusión

Os podcasts seleccionados serán emitidos pola Radio Galega; á súa vez, serán difundidos a través da páxina web da Radio Galega e da canle dixital do Diario Cultural. Así mesmo, recibirán difusión a través dos medios web da Consellería de Cultura, Educación, Formación Profesional e Universidades (Bibliotecas Escolares de Galicia e outros).

Emitiranse entrevistas aos programas gañadores o 17 de maio, na programación especial da Radio Galega con motivo do Día das Letras Galegas.

Os materiais elaborados pasarán a ser propiedade da Consellería de Cultura, Educación, Formación Profesional e Universidades, conservando a autoría dos seus creadores, co fin de servir como exemplo de boas prácticas, para o que deberán ser publicados cunha Licenza Creative Commons CC BY-NC-SA



Creative Commons CC BY-NC-SA

Permítese o uso non comercial da obra e das posibles ob derivadas, a distribución das cales debe facerse cunha licei igual á que regula a obra orixinal.

Cando os centros fagan difusión dos traballos realizados no contexto do programa **V Concurso de Podcasts Radio na Biblio** nos seus espazos web, deberán indicar a súa participación neste proxecto da Consellería de Cultura, Educación, Formación Profesional e Universidades, coa utilización do logo do programa, que deben descargar no enderezo <https://www.edu.xunta.gal/biblioteca/blog/?q=node/1690>

Os centros educativos deberán contar coas preceptivas autorizacións das familias conforme ao anexo que se achega nesta convocatoria.

"os podcasts para ser emitidos deberan respectar os criterios reitores da dirección editorial da Corporación RTVG",

A divulgación dos podcasts seleccionados pretende poñer en valor as creacións radiofónicas dos nosos escolares e tamén crear un repositorio deste tipo de arquivos, accesible a través de <http://www.crtvg.es/rg/podcast>. Os podcasts, para ser emitidos deberán respectar os criterios reitores da dirección editorial da Corporación RTVG.





As emisións da Radio Galega e a canle dixital deste medio emítense para todo o mundo; os podcasts estarán dispoñibles na páxina web durante cinco anos a partir da súa publicación. Os centros participantes comprométese a respectar a lexislación e regulamentación aplicable, como a Lei de Protección de Datos e a Lei de Propiedade Intelectual.

## **Apartado 12. Aceptación das Bases.**

O feito de participar neste concurso implica o coñecemento e aceptación das presentes bases. O incumprimento de calquera delas conlevará a descualificación do centro participante.

### **Disposición adicional única. Información básica sobre protección de datos persoais**

1. Os datos persoais recadados neste procedemento serán tratados na súa condición de responsable pola Xunta de Galicia, Consellería de Cultura, Educación, Formación Profesional e Universidades, coas finalidades de levar a cabo a tramitación administrativa que derive da xestión deste procedemento.
2. O tratamento dos datos baséase no cumprimento dunha misión en interese público ou no exercicio de poderes públicos, conforme á normativa aplicable e as referencias recollidas en <https://www.xunta.gal/información-xeral-proteccion-datos>
3. As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou de forma presencial nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/información-xeral-proteccion-datos>
4. No caso de existir diferentes referencias normativas en materia de protección de datos persoais neste procedemento, prevalecerán en todo caso aquelas relativas ao Regulamento (UE) 2016/679, Xeral de Protección de Datos ou a Lei Orgánica 3/2018, de 5 de decembro, de Protección de Datos Persoais e garantía dos dereitos dixitais.

Santiago de Compostela

A directora xeral de Ordenación e Innovación Educativa

Judith Fernández Novoa



## ANEXO I – MODELOS DE AUTORIZACIÓN

### V CONCURSO DE PODCASTS-RADIO NA BIBLIO

(Por favor, marque o que proceda)

Don/dona..... con DNI....., e con domicilio en .....;

como pai/nai/titor/titora do alumno/a..... do centro de ensino .....

**Autorizo** a participación do/da meu/miña fillo/a na gravación de podcast que sen van presentar ao V *Concurso de Podcasts-Radio na biblio* convocado pola Dirección Xeral de Ordenación e Innovación Educativa da Consellería de Cultura, Educación, Formación Profesional e Universidades, así como a utilización pública da imaxe e da voz do meu/miña fillo/a na difusión destes podcasts, con finalidades educativas, a través dos espazos web da Asesoría de bibliotecas escolares (<http://www.edu.xunta.es/biblioteca>), e en actividades de formación do profesorado, así como, no seu caso, na páxina específica da CRTVG: <http://www.crtvg.es/rg/podcast>, e na Radio Galega, que emiten para todo o mundo e cun período de difusión de cinco anos.

**Non autorizo** a participación do/da meu/miña fillo/a na gravación de podcast que sen van presentar ao V *Concurso de Podcasts-Radio na biblio* convocado pola Dirección Xeral de Ordenación e Innovación Educativa da Consellería de Cultura, Educación, Formación Profesional e Universidades, así como a utilización pública da imaxe e da voz do meu/miña fillo/a na difusión destes podcasts, con finalidades educativas, a través dos espazos web da Asesoría de bibliotecas escolares (<http://www.edu.xunta.es/biblioteca>), e en actividades de formación do profesorado, así como, no seu caso, na páxina específica da CRTVG: <http://www.crtvg.es/rg/podcast>, e na Radio Galega, que emiten para todo o mundo e cun período de difusión de cinco anos.

En ....., o ..... de..... de 2023

Asdo:.....





## ANEXO I – MODELOS DE AUTORIZACIÓNS

(modelo para autorización da participación dos adultos)

### V CONCURSO DE PODCASTS-RADIO NA BIBLIO

Don/dona..... con DNI....., como integrante da comunidade educativa do centro de ensino ..... de .....

**Autorizo** a gravación da miña voz na realización de podcasts que se van presentar ao V *Concurso de Podcasts-Radio na biblio* convocado pola Dirección Xeral de Ordenación e Innovación Educativa da Consellería de Cultura, Educación, Formación Profesional e Universidades, así como a utilización pública da miña imaxe e da miña voz na difusión destes podcasts, con finalidades educativas, a través dos espazos web da Asesoría de bibliotecas escolares (<http://www.edu.xunta.es/biblioteca>), e en actividades de formación do profesorado, así como, no seu caso, na páxina específica da CRTVG: <http://www.crtvg.es/rg/podcast>, e na Radio Galega, que emiten para todo o mundo e cun período de difusión de cinco anos.

En ....., o ..... de..... de 2023

Asdo:.....

